

Naqqiut

Akissuteqaat 7. november 2022-meersoq taarserpaa
(inassuteqaammit allunnguineq)

Pisariartitsineq aallaavigalugu nunalerinermik ilinniarfimmik pilersitsisoqarnissaanut Naalakkersuisut nalunaarusioqquneqarnissaaanik Inatsisartut aalajangiiffigisassaattut siunnersuut. Nalunaarusiaq Narsami Nunalerinermik ilinniarfimmik pilersitsinissamik qulaajaanerusaaq, pingaarnertut imminut pilersorsinnaaneq, nunalerineq aamma nerisassanik tunissassiornermik siunertaqartumik. Nalunaarusiaq Inatsisartut 2023-mi ukiaanerani ataatsimiinneranni agguanneqassaaq.

(Inatsisartunut ilaasortaq Mariane Paviasen, Inuit Ataqtigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq).

Siullermeerneqarnera

Naalakkersuisut sinnerlugit Inatsisartunut ilaasortaq Marianne Paviasen, Inuit Ataqtigiit, aalajangiiffigisassatut siunnersuutaanut qutsavigaara.

Piffissami matumanerpiaq nunatsinni nunalerinermik ilinniarfeqanngilaq, taamaallaallit Upernaviarsummi savaatilinggorniat ilinniarfiat neqeroorutigineqartarluni. Savaatilinggorniat ilinniarfianni agguaqatigiissillugu ukiumut savaatilinggorniat pingasut ilinniakkaminnik naammassisarput. 1974-ip kingornagut savaatillit katillugit 130-t ilinniakkaminnik naammassisimapput. Inuilip siulersuisui ilinniarfiup qullersaattut oqartussaapput kiisalu Naalakkersuisut sinnerlugit ilinniarfiup ingerlatsinera akisussaaffigalugu, matumani aamma Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersoq naapertorlugu. Ilanngullugu oqaatigineqarsinnaavoq Upernaviarsummi misileraavik kiisalu naatitsivik Nunalerinermik Siunnersuisoqarfiup ingerlatarimmagu, taannalu Nunalerinermut, Imminut Pilersornermut, Nukissiuutinut Avatangiisinullu Naalakkersuisoqarfiup ataani inissisimavoq.

Upernaviarsummi misileraavik aammalu savaatilinggorniat ilinniarfiat pillugu Naalakkersuisut § 37 naapertorlugu apequteqaammut nr. 127/2022-mut akissuteqaamminni ilisimatitsissutigaat nassuiaasiornermik suliamik aallartitsisoqarnikuusoq. Tassunga atatillugu savaatilinggorniat ilinniarfiat nunalerinermik ilinniarfinngortinneqarsinnaanersoq kiisalu Inuili pitsannorsarneqarsinnaanersoq misissorneqassaaq. Suliaq taanna maanna ingerlanneqarpoq.

Naalakkersuisut naliliipput isumatusaarnerpaassasoq siunnersuutigineqartuq savaatilinggorniat ilinniarfiat aamma Inuili pillugu misissuinermut ilanngunneqassasoq kiisalu nassuiaat naatsorsuutigineqartuq august 2023-mi saqqummiunneqassasoq.

Taamatut oqaaseqarlunga allannguutissatut siunnersuut ima ittoq saqqummiutissavara:

“Nunalerinermik ilinniarfimmik pilersitsinissamik pisariaqartitsinermik qulaajaanermik imminut pilersornermik kiisalu inuussutissanik tunisassiornermik qiterititaqartumik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut. Qulaajaaneq Naalakkersuisut savaatilinggorniat ilinniarfiata aamma Inuilip allanngortinneqarsinnaanerani kiisalu nutaanngorsarneqarsinnaanerani periarfissanik misissuinermit aallartissimasaannut ingerlareersumut ilaassaaq. Nalunaarusiaq kingusinnerpaamik Inatsisartut 2023-mi ukiakkut ataatsimiilerpata tunniunneqassaaq.”